

DISPUTATIO MEDICA  
INAUGURALIS

DE

P E S T E.

Q V A M

PRÆSIDE DEO OPT. MAX.

*Ex auctoritate Magnifici Rectoris,*

D. FRIDERICI SPANHEMII, Fil. S.S. Th.

Doctoris, Ejusdemque Facultatis in Illustri Academia Lugd.

Bat. ut & Antiquitatis Ecclesiasticæ, Profess. Primarii,

Ecclesiasticæ disertissimi, Acad. Bibliothecarii,

N E C - N O N

*Amplissimi Senatûs Academici Consensu, ut & Alma*

*Facultatis MEDICÆ Decreto,*

PRO GRADU DOCTORATUS,


Summisque in MEDICINA Honoribus ac Privilegiis  
ritè & legitime consequendis,

*Publico examini subjicit*

BARTOLDUS FLORIANUS GERSMANNI

Göttingensis-Saxo.

*Ad diem 2 Decemb., loco horisque solitis.*



LUGDUNI BATAVORUM,

Apud ABRAHAMUM ELZEVIER,

Academiæ Typograph. MDC LXXXVII.

*Clarissimis, Expertissimis, Celeberrimisque*

V I R I S

D. CAROLO DRELINCURTIO, Philos. ac Medicinæ Doctori, Christianissimi Galliarum Regis . Consiliario, nec non gloriæ M. Principis de Turenna olim Archiatro; Nunc vero in Ill. hac Academia Medicinæ Antecessori dignissimo, Anatomico nulli secundo.

D. LUCÆ SCHACHT, S. S. M. C. L. A. M. Philos. ac Medicinæ Doctori, hujusque in Ill. hac Academia Professori Ordinario, Collegii Chirurgici Præsidi, Practico Felicissimo, Exquisitissimo.

D. CAROLO DE MAETS, Philos. ac Medicinæ Doctori hujusque in Illustr. hac Academia Professori Ordinario, Artis Spagyricæ Cultori indefesso, exercitatisimo. p. t. Decano.

D. PAULO HERMANS, Philos. ac Medicinæ Doctori, hujusque in Illustr. hac Academia Professori Ordinario, Botanico, si ullus, Versatissimo.


D. ANTONIO NUCK, Medicinæ Doctori, olim Hagæ Comitum, nunc Lugduni Batavorum Professori Anatomix Celeberrimo, Exercitatisimoque.

Disputationem hanc Inauguralem  
officiosissime

D. D. D.

BARTOLDUS FLORIANUS GERSTMANN,  
*Auctor*





DISPUTATIO MEDICA

INAUGURALIS

DE

P . E S T E .

P R O O E M I U M .



*irum fortasse Tibi L. B. accidet, quod de Peste disputem, cum tot jam volumina de hac materia agentia inveniantur. Sed mirari desines, si audieris, quid ad hoc me impulerit; Legi enim multos qui de Peste scripserunt, sed transcriptores fere omnes, eminus scribentes, & vel extra pestis tempora, speculationum plausibilitate contenti, vel intra pestis tempora metu mortis conjecturales, in varias ita quidem abeuntes sententias, rem vero nunquam explicantes, sed in majores absurditates ducentes. Eorum rationes omnes, quantum licuit accurate perpendi, sed mihi non satisfacere. Cum bis ipse in peste vixerim, (absit*

A 2

dicto



dicto jactantia) & gratia Dei benignissimi servatus sim  
 multaque tum observarim, quæ dictis rationibus bene fulciri  
 non videbantur: unde etiam hanc materiam pro themate  
 graduali eligendi, & meam de ea opinionem orbi erudito ob  
 oculos ponendi occasionem sumpsi. Accedit quod alias Me-  
 dicina Studiosus, tanquam praxi plerunque hætenus de-  
 stitutus disputaturus, nisi cum umbris digladiari velit, o-  
 mnia ex libris & Autoribus, haurire necesse habeat. Equi-  
 dem me non fugit, ea, quæ in his thesibus continentur, non  
 approbari ab omnibus, sed rejici, & tanquam nova deri-  
 deri. Nova vero non sunt; cum Autores fere omnes, ubi  
 de causis remotis agunt, temperare sibi vix possint, quin  
 terroris pariter mentionem faciant. Ast in hoc mihi eve-  
 nit, quod multis evenire solet; nempe unus placere nequit  
 omnibus. Expertis expertus scribo, eosque assentientes ha-  
 bebo. Minus experti si hæc paucula, semotis præconceptionis  
 opinionibus legent, & serio de iis cogitabunt, sibi suisque  
 ægrotis melius consulent, nec turpi fuga, quam tamen mul-  
 ti non sine læsione famæ tristi illo tempore arripere solent,  
 maculam sibi inurent. Faxit summus Parens, ut omnia  
 cedant in sui nominis gloriam, & ægrotorum salutem!

## T H E S I S I.

**D**e Origine, Etymologia, & significatione vocis Pæstis hic di-  
 cere supersedeo, cum de his pleni sint Autorum libri. Suf-  
 ficiat annotasse vocem hanc nullo modo involvere venenum,  
 neque contagium, ut vulgo statuunt secum ferre. Pæstus est mor-  
 bus acutissimus, hominem cito interimens, à terrore & imaginatione  
 ortum trahens. Non definio per febrem, ut nonnulli faciunt,  
 quia interdum sine febre est, si cui tamen ita lubeat, de hoc  
 non disputabo. Ut dicta & dicenda melius intelligantur, pau-  
 cula de massa nostri sanguinis annotare haud erit inutile. Con-  
 stat eadem ex particulis diversi generis & figuræ, oleosis, vo-  
 latilibus, terrestribus, aquosis, justa proportionem inter se mixtis,  
 for-

formatis in globulos seu guttulas , quarum quisque ex diversis particulis compositus, liquori aqueo seu sero innatantibus. Cujus analysin (cum nimis prolixum foret , si pertractare velim) ex principiis Chemicis *Illustr. Boyle* nuper nobis exhibuit , item Acutus *Vir Leeuwenhoeck* in suis operibus Belgico Idiomate conscriptis , qui videri possunt. Rubedo seu color sanguinis à sibi incumbentibus globulis , in quorum poris & interstitiis materia ætherea repercutitur , & repercutiendo visui hunc colorem exhibet , oritur. Huic non obstat, quod nonnulli hunc colorem à salibus deducant, cum eadem salia habeant poros, in quibus materia ætherea reperi potest , Colorque nihil est aliud, quam umbratilis corporum dispositio, orta ab irregulari corporum positiu superficieculis & poris variis instructorum. Colorem autem illum non esse de essentia sanguinis experimento clare demonstrari potest; si enim aqua calida aliquoties superaffunditur sanguini, antequam concresecit, color ruber totus evanescit, & massa albicans relinquitur, quæ nihil aliud est, quam chylus poros habens constantiores, unde color ille albus, qua de re legi possunt Anatomici. Taceo observationes & experimenta annotata passim ab Anatomicis, qui post unam vel duas horas à sumtis alimentis venam secuerunt, & chylum ex vena manantem conspexerunt. Porro hic color non apparet ubique, sed pro ratione pororum nunc hic, nunc alio in loco, alio modo coloratus liquor secernitur. Eo enim modo puto fieri circulationem sanguinis cum non dentur anastomoses arteriæ & venæ, sed arteriæ junguntur tubuli, per quos sanguis transit, usque dum accedat ad venarum tubulos, & ibi se exoneret. Omnes autem humores, quicunque etiam sint à sanguine secerni, eorumque circulationem esse continuam, manifeste probant mammæ, glandulæ, testes, quæ corpora nihil aliud sunt, nisi arteriæ & venæ minutissimæ, eum in modum convolutæ, ut ob minimam exilitatem & densam convolutionem caro esse videantur, quam vasorum convolutionem Anatomici postea glandulas vocarunt. Necessario autem debet aliqua eorum esse origo, unde alias deduceremus liquorem quem fundunt, cum per carnem transsudare vix possit; nam nullus in corpore liquor, sive sit sanguis, sive serum intrat partes solidas, sed per vias eum in finem factas ducitur. Patet id in contusione, ubi san-



guis extravasatus , & in partem solidam effusus putrescit , & sæpe partem corrumpit , ut infra , ubi de carbunculis dicetur , pluribus patebit.

§. 2. Vocem *Contagium*, qua vulgo Autores in describenda natura *pestis* utuntur, lubens omitto, cum eadem semper apud eos indicet *venenum* ut in peste, sive *sal corrosivum*, ut in Dysenteria, sive aliud ut in Phthisi, & fere nihil aliud, nisi occultam qualitatem dicere, & intelligere videantur, sicque inter se dissentiant, & quale sit venenum nesciant, dum unus statuit esse *volatile* massam sanguineam resolvens, alter videns carbunculos & bubones, in *acido corrosivo coagulante* naturam Pestis ejusque essentiam consistere asserit, alius videns horrendos vomitus, *arsenicale* autumat, quartus observans ægros, quos pestis dormiendo invadit, *narcoticum* venenum affirmat. Sed omnes hæ opiniones rei non explicant, multis adhuc difficultatibus laborant, & admodum incertæ sunt. Certe non video, quare venenum statuendum, cum omnia pestis phænomena habeant eandem rationem & causas cum morbis extra pestem grassantibus. Quoad sedem alius in ventriculo, alius in capite, alius in alio loco sedem fixam habere contendit, inde vomitoria alii, venæsectionem alii, alii purgationem suadent. Ita à scopo aberrant, & inter se dissentiunt. Ad summam, quis omnes omnium opiniones recensendo persequi potest? Plura qui cupit adeat Autores, *Helmont. Tum. pest. Kircher. Scrutin. pest. Sennert. Cardiluc. Sylv. Barbett.* & alios, qui ex professo hanc materiam pertractarunt. Neque explicatur essentia pestis per *malignitatem*, quæ nihil aliud significat, quam morbum esse periculosum. *Vid. B. Bontekoe in tract. Belg. Gedeu over de Kooztzen. p. 32.*

§. 3. Causam *pestis* proximam dico esse *terrorem*, non *aërem* & in eodem latitans *venenum*. Nam consensu omnium Medicorum qui de peste Germaniæ nuperrima scripserunt, constat, aërem non fuisse infectum; alias enim non potuissent loca infecta peste excubiis coerceri, ne malum ulterius serperet. Experientia manifeste docuit, malum ulterius non fuisse propagatum, si sani vitarunt colloquia & consortia infectorum. Nihil omnino probant omnia experimenta instituta cum aqua, quam in vase aliquo per noctem in domo preponunt, &, si mane cuticula cærulea superinducta est aquæ, pro infecta certo pronuntiant,

cum

eum tamen hæc aquæ corruptio, si vera est, possit aut à vâse, quod forsan non fuit purum, aut ab ipsa aqua, quæ diversis in locis nunc has, nunc illas particulas secum vehit, ortum trahere, ita ut in re adeo incerta, certi quid velle concludere, absurdum judicem. Non absimile pariter experimentum, ad aërem impurum dignoscendum à puro, faciunt cum pane recens cocto. Unde passim in scriptis loimographicis pistoribus panem recens coctum & adhuc calentem ex ædibus portare prohibitum, antequam frigefactus sit sub magna pœna: dicunt enim panem recentem ex aëre venenum attrahere. Sunt quoque nugæ, quod quidam dicant, se vidisse fumum sulphureum per aërem volantem. Causas alias superfluas & nugas inutiles plane rejicio, cum certo non constet, quod unquam à fœtore, aut aliis rebus, quæ pro causis remotissimis adducuntur, orta pestis fuerit. Ut autem terroris effectus & vis in nostra corpora melius pateat, necesse est ut in naturam ejus inquiram paulo penitius.

§. 4. Terror est subita & repentina alteratio & mutatio, facta in corpore hominis organico ob mali cujusdam ingentis repræsentationem in glandula pineali animæ, qua fit, ut anima functionum ordinariorum oblita spiritus ad partes modo solemniter non amandetur, inde massa sanguinea turbatur, globulorum junctura & mixtura interrumpitur, & tot symptomatibus via sternitur. Talem autem vim habere terrorem, ut tantas in machina nostra turbas excitet, multi passim Autores, qui de peste scripserunt, confirmant. *Barbette*, quamvis dicat, pestem esse morbum incomprehensibilem, tamen metum & terrorem posse pestem inducere statuit, *in tract. de peste p. m. 257. ita in-* *quiens: Metus multis mortem immisit, & certæ morti subjecit.* Terror igitur, quem inter causas remotas ponit, est etiam causa proxima. Terror hominem viso lupo reddit *ἀφορευ*, non quod aliquid veneni ex oculis lupi exhalet, sed quod ob imminens vitæ periculum homo terrorem concipiat, dum objectum terribile animæ repræsentatur, quæ de periculo cogitans à muniis solitis desistit, nec ad nervos linguæ spiritus amandat, inde homo volens auxilium ab aliis clamando petere, aut animal eodem sonitu abigere, mutus non potest, de quo videri potest pluribus *Dan. Maj. Chirurg. Infus. pag. 277.* Ex recentioribus

bus hanc sententiam haud ita dudum publico scripto egregie probavit *Experientissimus Rivinus*, qui videri poterit in *dissertatione de peste Lipsiensi*. Ipse meus Parens consono annotatis aliorum Historiis Medicis annotato exemplo, habuit Epilepticum, qui incedens in hypocaustum, ubi quædam Epilepsiam patiebatur, horrorem concepit, eodemque malo statim correptus est, idque in hunc usque diem servat; à purgantibus paroxysmus cessat, à sudoriferis augetur. Hinc prout diversimode objecta animæ repræsentantur, diversi sequuntur effectus. Sic cum Festi Nativitatis Christi die incendium surgeret, tres peste laborantes, qui in vado salutis tum erant, cum denuo terrorem caperent, subito sunt extincti. Eodem modo Anno 1687. ante hebdomadam unam vel alteram vidi in Nosocomio Academico Leydeni (cujus in curandis ægris curam tum habebat *Dn. Prof. Hermannus nunquam sine debito honore & observatione mihi nominandus Fautor & Præceptor*) puellam quandam 15, vel 16 annorum, quæ terrore percussa inde sensit notabiles præcordiorum anxietates, nauseam, respirationem difficilem, adeo ut semper aperto ore respirare coacta fuerit, appetitum dejectum, aliaque symptomata. Menses in principio quidem obstructi post rediére, dictis tamen symptomatibus continuantibus. Taceo observat. Practicorum, qui multos à terrore mortuos referunt. Pestem autem à terrore, non à veneno originem sumere, rationibus & exemplis clare demonstrare annitar.

§. 5. Ad hoc probandum hic repetere debeo, quod superius jam dixi, Aërem non esse infectum, adeoque contagio universali destructo, jam quoque non dari contagium particulare dicam. Cur enim ex tot particularibus contagiis, puto tot ædibus, tot personis infectis (cum in una domo sæpe octo, novem & plures ægroti inveniantur) exhalare non possit tanta copia veneni pestilentis, ut aërem inficere potens sit, tanquam, si Autoribus credendum, adeo sui multiplicativum, præprimis, cum juxta *Sanctorii Medicinam staticam* plus una die per insensibilem transpirationem secedat à corpore, quam per trium dierum sedes, qui-eum in finem videri potest pluribus. Sed cum nec hoc fiat, nemo mihi facile persuadebit, dari *contagium particulare*. Excogitatum est forsan ab iis, qui cum universale contagium



gium retinere non potuerunt, ut venenum tamen retinere possint, particulare fixerunt. Destructis itaque contagiis universali & particulari, necessario ad aliam causam pestis confugiendum, quam supra jam dixi esse terrorem. Communiter, ab omnibus Loimographis statuitur, quod venenum pestis subito ad interiora penetret, citissimeque omnes corporis partes pervadat, & tamen simul dicunt quod permultos saepe menses in corpore possit delitescere. Sed, qui hoc fiat dum quaeritur, confugiunt ad dispositionem, & in parte aliqua solida latere dicunt. At quia extra accedit, & vel per os, seu poros corporis deferitur ad massam sanguineam juxta eorum mentem, ob suam volatilitatem & penetrantiam fulminis instar eam statim destruet, & cum spiritus corporis partes solidas pervadant, (cum æque circulentur ac reliqui humores) facile cum iisdem posset conjungi. Quid autem sit dispositio illa non possunt explicare; est vocabulum quod usu & assuetudine didicerunt, & retinent, ut facultates concoctricem, expultricem, attractricem, &c. meras chymæras. Quare autem pestis in corpore latere possit, infra demonstrabitur.

§. 6. Contagium quod scilicet sit multiplicativum sui non adesse arguit, 1. Quod tota civitas, si jam aliquot ædes sunt infectæ & ideo venenum jam multiplicatum, simul & semel non inficiatur, quin potius experientia docet; quod omnes illi qui consortia hominum vitant, peste non inficiantur, ut supra §. 5. pluribus jam dictum. 2. Quod si venenum omnes invaderet, etiam non timentes invaderet, quod tamen non fit, quoad animo sunt constanti, venenum enim pestilentielle esset hoc modo rationale, & posset nosse, hunc vel illum sibi à veneno non timere. 3. Curatio indicat in peste non esse venenum; nam in curatione omne absolvunt punctum sudorifera, ut infra dicetur. 4. Curatio per sudorifera esset inutilis; si venenum esset in peste; nam juxta eorum mentem sudorifera expellunt è corpore, & à centro ad peripheriam ducunt; si hoc esset, æger venenum expulsum per poros à calore magis patulos denuo statim hauriret, dum in eodem lecto, in quo sudavit, manet; videmus autem contrarium: si sudor in principio terroris instituitur, & bene succedit æger melius se habet, & certo restituitur. 5. Omnia phænomena, quæ in peste apparent, per causas naturales sine veneno explicari possunt; quare ita

que confugeremus ad rem, cujus indolem & naturam nemo huc usque acutissimorum Philosophorum & Medicorum expiscari potuit. Id quod *Cardilucius*, qui, ut ipse fatetur, aliquoties in peste vixit, testatur, dum in tract. de peste scribit. *Pestis naturam adhuc esse incognitam, & neminem reperiri, qui de ea accurate scripserit, & certa ac indubia media contra eam proposuerit. vid. ejus praf. plur.* 6. Apparet etiam ex iis, qui semel peste fuerunt correpti, & evaserunt, intrepide alios visitant, & raro peste iterum corripiuntur, sed simul ac timent, timorem presso pede sequitur malum, & lecto affigit. 7. Si venenum tale in peste esset, quale fingunt Autores, una eademque semper in omnibus observarentur symptomata, quod tamen neutiquam fit, ut ex Historiis & observat. Pestis satis patet, cum in propatulo sit reliqua venena determinatos habere effectus, & uno eodemque modo semper operari. 8. Vomitoria & purgantia indicant non esse venenum; nam nihil juvant, sed massam sanguineam magis turbant. 9. Vulgus causam tam manifestam in se ipso experiens, & omnes tempore pestis, si ex iis quæritur, ex qua causa peste laborent, respondent terrorem concepì, *Ich bin erschrocken.*

§. 7. Dux hic objectiones, quæ maximum movent scrupulum, diluendæ; quarum prior est, cur infantes cum non terreamur, peste corripiantur? posterior: Cur, & an bestię peste corripiantur, & moriantur. Ut hanc quæstionem recte tractemus, distinguendum puto inter infantes recens natos, & eos qui sunt trium vel quatuor annorum. Ii qui jam aliquo modo provecti ætate sunt, cum habeant corpus organicum anima instructum, eadem ratione, qua reliqui, peste corripiuntur; nam objecto horrendo sibi representato, anima horret, & functiones ordinarias deserit, ut supra ex dictis facile liquet. Anima enim, cum ejus essentia in cogitando consistat, à primis vitæ primordiis cogitat, quamvis in infantibus non æque ut adultis id observemus, cum ob poros & fibrillas nervorum in cerebro tenello adhuc inconstantes, & facile flexiles representata non adeo diu hæreant. Recens nati infantes matribus mortuis nutricum curæ commissi, ob earum negligentiam, lactis defectum, & in ejus locum pultis substitutionem, taliaque incommoda, tristi & inordinato illo tempore obvenientia, moriuntur, signa enim pestis pathognomica in illorum corporibus tenel-

tenellis non apparent. Ad bestias quod attinet, eæ cum rationis & sensus sint expertes, hac ratione minime peste possunt corripì. Moriantur eadem morbis quos ex pastu contraxerunt. Exempli loco sit annus 1686. qui fere omnes oves in Comitatu Mansfeldensi absumpsit, idque ob summum æstatis præteriti ardorem, & in le graminis defectum. Oves igitur ut famem sedarent, quicquid in agris invenerunt, herbas etiam noxias comederunt. Ut taceam eas herbas seu gramina terræ proximiora depascere, ubi vermes insectaque alia copiosiora reperere & nidulari solent, facile potuisse cum alimentis noxia varia ingerere, ceu colonis patet vegetabilia à muribus arrosa, vel urina eorum aspersa & madefacta iisdem plurimum nocere. Inde evenit, ut ob famem in teneriori earum, ideoque attentiore cura præ aliis nostris cicuribus quadrupedibus observando, corpore meatus & tubuli conciderint, & obstructi sint, præcipue quia prævio hyemis tempore largiori victu pastæ fuerint, unde circulatione humorum ob tubulos obstructos sufflaminata, mors insequi debuit. Jam vulgus ad hanc causam non attendens accusat contagium, quod tamen minime est. Et hac ratione puto accidere & evenire plurimarum bestiarum mortem, quam nonnulli Autorum pestem vocare solent. Historiæ & observationes Practicorum de hominibus tempore famis idem testantur, imo Anatomici referunt, eorum intestina & ventriculum fuisse plane corrugata: Notum insuper est, eos, qui longo navali, vel etiam terrestri per loca desertiora itinere detenti, & parcissimo, licet non semper malo, victu uti necessum habuere, domum reduces pedetentim denuo largiori victu assuescere debere, ob ventriculum angustatum, simul & semel se extendere nescium, ni certam sibi mortem procurare velint. Præterea nulla signa pestis, nec pathognomica, nec alia in corporibus bestiarum apparent, inde hominibus propria dici pestis potest.

§. 8. Videor mihi audire quosdam dicentes, si à terrore pestis, quare non à terrore quovis oritur, & succedit statim pestis. Sed sciant, animam nostram pro ratione objectorum semper judicare, & secundum hoc iudicium spiritus ad partes amandare. Quo jam objecta repræsentata atrociora, eo gradus terroris etiam major, id quod supra è §. 5. apparet in *Epileptico in quo terror Epilepsiam produxit; Item in puella, cujus §. 4. mentio fa-*



*Ha est in qua terror varia symptomata produxit. Sic Langius in Epistolis annotat, quosdam, audito nuntio de Parentum, agnatorum, vel natorum morte, esse mortuos. Gradum terroris auget quod videant paucos evadere, plurimos vero mori, quamvis usi sint medicamentis sat bonis & probatis.*

§. 9. Superius allatas rationes propriis exemplis jam illustrabo. *Mater mea volens adire templum ad audiendum verbum Dei, prateriens domum, in qua eodem die horis matutinis adolescentem mortuum peste sciverat, videntque fenestram apertam, sibi imaginatur per eandem exhalare venenum, idque se mediante aëre attrahare, exinde terrefit, adit templum, durante concione horrorem febrilem, postea calorem per totum corpus sentit, domum rediens conqueritur de dolore capitis, virium prostratione, anxietate cordis. Lectum petit, & datis sudoriferis intra octiduum convalescit. Uxor Gymnasiarcha, quæ ab omni hominum consortio se abalienaverat metu pestis, post partum cum fascias infantis lavasset, & calori solis exposuisset in muro domus vicini proximi (quæ tamen nondum erat infecta, sed altera ab hac domus) percipiens fascias spirare odorem tetrum, sibi imaginatur illum esse à veneno pestis, & huc mediante aëre ex adibus vicini esse allatum; statim horrorem concipit, post dolorem capitis atrocem, bubonem in dextro inguine, qui ad tantam magnitudinem excrevit, ut fere pilam majorem adequaret, sed nullum carbunculum sensit. Eadem adhibitis debite alexipharmacis, amisso tamen visu oculi dextri ab inflammatione, convaleuit. Expresse affirmavit postea, se peste periiisse, si eadem se laborasse scivisset. Obserratu dignissimum, quod nemo in his adibus, quoniam Heram peste laborare nesciverunt, agrotaverit. Maritus intrepidus munere Chirurgi functus nullum omnino in corpore pestis vestigium sensit.*

§. 10. Ex solo audito nuntio pestis propagata est. *Nostra ancilla audito nuntio; quod soror ipsius peste laboraret, & morti vicina esset, ex fenestra præ terrore concidebat, & circa vesperam bubones in utroque inguine sentiebat, quæ data Tinctura bezoardica convaleuit. Vidua quædam volens adire molam; audit ex proxima domo clamantem Judæi uxorem delirantem, terretur, & domum reversa sentit dolorem capitis, & omnia paulo post pestis signa, sed non vitato frigore, moritur. Ex insomniis quoque pestem oriri sequens exemplum demonstrabit. Vidua, cujus jam mentionem feci soror, somniavit se audire sororem peste laborantem clamantem, & auxilium ejus anxie-*  
expe-

*expetentem, inde evigilat, horret, & mane de dolore capitis anxie-  
tate prae cordiorum conqueritur, & audita morte sororis, eadem mori-  
tur. Abdicarat se ab omni hominum consortio, ut pestem fu-  
geret, & ejus gratia extra urbem in lapidicina ædes parare in-  
stituerat, citius tamen, quam ædes exstructæ erant; moriebatur.  
Unicum adhuc è plurimis similibus adduxisse sufficiat: Juvenis  
præteriens domum coqui publici circa vesperam, sibi imaginatur se vi-  
dere coquum, qui tamen jam terra mandatus erat, in porta ædium  
stantem, terretur, & domum rediens sub axilla dextra bubonem ma-  
gnitudine nucis avellana sentit. cum anxietate cordis, & virium de-  
jectione, qui tamen uno dato sudorifero convaleuit. Sexcenta possem  
adducere exempla, si necessitas efflagitaret. Sed hæc sufficiant,  
quæ ipse observavi. Sciens scribo, multosque ex iis ægros vi-  
di, & visitavi ipse. Plura exempla qui desiderat, adeat Expe-  
rientissimi Rivini dissertationem de peste Lipsiensi, Item Gieslerum de  
peste Brunswicensi; qui aliud agendo talia exempla multa annotavit, &  
cum omnibus circumstantiis accurate delineavit.*

§. II. Hæc ipsa imaginatio terrori nostro in morbo fere sem-  
per conjuncta, inter causas socias merito ponitur. Oritur autem  
i la ab anima, dum glandulam pinealem movet, spiritusque ad  
eos cerebri poros impellit, quorum apertione hoc, quod vult,  
sibi repræsentat, sive fiat forruito, sive ab alio objecto. Vi-  
detur non multum differre à memoria; nam si oritur in anima  
ab objecto externo malum præteritum repræsentante, anima  
quasi hoc indefinenter repetit & præteritorum periculorum re-  
cordatur. Vulgo de imaginatione in proverbio dicitur, eam  
esse peste majorem & pejorem, id quod in ipso pestis tempo-  
re verum, quanquam in aliis etiam morbis incredibilis fere ejus  
efficacia luculenter elucescat. Satis superque demonstrant id  
melancholici, quantas turbas in œconomia animali ea efficere  
valeat, quando sæpius sibi imaginantur se esse Reges, Nobi-  
les, cum tamen sint ex infimo hominum genere, se esse cor-  
nutos, lupos, gallinas, frumentum, & id genus alia, de qui-  
bus legi possunt Historiæ & Observationes Præticorum. Ita  
etiam se res habet in peste, ægri aut adhuc sani dum legunt,  
vel audiunt signa pestis, & talia forte ex errore dixitæ, aut a-  
lia ex causa in corpore eveniunt, statim ratiocinantur: jam pe-  
stis grassatur, & talibus incipit symptomatibus eaque tu jam tuo



sentis in corpore, ergo tu necessario pestem contraxisti. Hanc imaginationem ex signis illis sequitur terror, quem pressio pede sequitur pestis, nisi æger animo sit constanti, & periculum aliis cogitationibus avertendo ad se redeat. Assentientem hac in parte habeo *Cardilucium* pag. 24. tract. de peste, dum ait: *Interdum hæc lues, in locis sanis, ubi aer purus, nec infectio ab aliis locis metuenda, per imaginationem potest excitari, si nempe afferretur nuntius, (quamvis sit falsus) quendam ex amicis proximis in regione externa peste mortuum esse, inde summus terror, ingens etiam de peste imaginatio oriuntur, unde quis sibi ipsi morbum realiter accersere, & consequenter alias inficere potest. Vid. pl. de hoc Rivini dissertatio. pag. 17.* *Cardilucius* vero citatus, causæ pestis à se statutæ, dum in putrefactione in præcedentibus consistere ait, non levem videtur facere injuriam. Quod autem non consistat in putrefactione, circa cujus hac in parte genium dissentiunt Autores, præter alia docet quies, putrescenti rei necessaria, quæ in massa nostra sanguinea, dum vivimus & movemur, non datur ob circulationem sanguinis reliquorumque in corpore contentorum humorum continuam. Neque tempus putrefactionis causæ favet, cum putrefactio lento procedat gressu, pestis autem homines subito invadat, & enecet. Ultimo pulsus & urina non essent, velut sæpe solent esse, sanorum similes, si in putrefactione pestis essentia consisteret.

§. 12. Reliqua animi pathemata, & affectus, ut tristitia, dolor, &c. quatenus in iis excessus fit, aliquem morbum in corpore gignere possunt, unde imaginatio potest oriri, imaginationem sequitur terror, terrorem pestis, & sic, ut supra jam dixi malum hominem invadit. Hic operæ pretium est referre, quomodo pestis propagetur, seu ex uno loco in alium deferatur: id quod ex superioribus itidem haud difficulter intelligitur. In proverbio dicitur: *Homō homini Deus, homo homini diabolus.* Hoc recte hic applicari posse puto: dum enim homo, fugiens ex civitate infecta sanam ingreditur, & post aliquot dies vel hebdomadas repentina morte exstinguitur, statim de peste in vicinia grassante est suspicio, visitatur mortuus, & si signa pathognomica hujus luis vel solitarie vel conjunctim apparent, necessario peste mortuus esse pronuntiatur, quod tamen peste in propinquiore loco grassante verum. *Novi enim puerum, qui*  
*pila*



pila luserat & inter ludendam ab alio verberibus exceptus erat, domum rediens sub axilla dextra tumorem ingentem sentiebat, quod si tempore pestis accidisset, etiam hic puer peste laborasset. Idem etiam scio de carbunculis, quale exemplum annotat Poppius in suo in Agricola comment, & qualia ampla praxeos Practicus precipue in maioribus civitatibus non ita raro occurrunt. De quibus eosdem quandoque referentes audias, sitalibus ægris mederentur tempore pestis, se eos pro peste infectis habituros esse. Hæc vero omnia, cum habeant & agnoscant causas absque contagii venenosi pestiferi interventu explicabiles; etiam extra pestem observantur.

§. 13. Quomodo de civitate in civitatem translata sit pestis, sequentes Historiæ monstrabunt. Anno O. R. 1681. mense Decembri Islebiam Lipsia, (qua tunc ob pestem suspecta erat) venit Chirothecarius circa vespertam, adit amitam suam in vico dicte lange strasse habitantem, qua eum suscipit, cibum desideranti preparatum affert; quem tamen tunc renuit; de lecto ob dolorem capitis petendo referens. Amita vero ægotantem in adibus perferre nolente, exit, & ad fratrem se confert, ubi susceptus cum eodem potat, abit dormitum, mane invenitur mortuus; nullis in corpore pestis signis apparentibus, literisque quas in marsupio habuerat solummodo declarantibus illum Lipsia venisse, qua occasione in tota illa domo omnes, excepta uxore fratris, successive occubuerunt. Anno 1682. mense Martio Muhlhusam Northusa venit pannifex, qui uxorem dolore capitis laborantem deseruerat, exinde terrore concepto elapso mense ibidem mortuus est, signis pestis in corpore apparentibus, id quod Chirurgus, jussu Magistratus ad demortui corpus inspiciendum missus, testatus est. In hac domo post aliquot hebdomadas nonnulli decubuerunt, & vitam cum morte commutarunt. Possit quis hic quærere, quare per tot hebdomadas latuerit pestis, adeo ut non statim homines sint mortui. Verum eo tempore gradus terroris adeo magnus nondum fuit, & licet forte aliquid in corpore senserint non statim de signis pestis cogitarunt, nec inde mali quid sibi imaginati sunt, usque dum à Magistratu jussi sunt vitare conventus publicos, & colloquia hominum. Præterea tristitia, paupertas, & alia ansam dederunt morbis in corpore, quos dum perpeccerunt, peste se infectos sibi imaginati sunt, inde terror, & consequenter pestis suborta est, ut supra pluribus deduxi.

§. 14. Ad pagos eadem ratione allata est pestis. Rusticula quadam inscia ingrediens domum infectam ad vendendum spiritum vini, dum egreditur, à vicino de infecta, quam egrediebatur, monetur, unde illa horret, & ad suos rediens peste corripitur, tertia die moritur, atque per hanc omnis pagus inficitur. Pari ratione omnes illi pagi infecti. Si tempus & instituti ratio permetteret, integrum catalogum Lectori sistere possem, quomodo pedetentim tota Muhlhusa hac lue correpta sit. Obiter annotabo quare omnes morbi tempore pestis in pestem degenerent. Hic duo videntur annotanda, 1. quare hoc eveniat, 2. an hoc semper verum sit? Primum ex superiori structo fundamento à terrore evenire dico, quod ipsum etiam exemplo ægri febricitantis illustrare licet, qui audiens pestem de integro infestare aliquod ædes in vico dieburgstrasse / statim peste corripitur, paucisque diebus post moritur. Nemo domesticorum neque vicinorum quisquam eum in locum venerat in quo tunc temporis pestis grassabatur. Ad alterum dico hanc propositionem non esse universaliter veram, itidem ex supra dicto fundamento. Parens meus curavit Hydropicum, qui, quoniam non timebat, peste non correptus est; aliquoties eum visitavimus, cum pestem nostris in adibus haberemus, nemo tamen infectus est, Hydropicus vero ejecto sputo cruento, mortuus est. Faber quidam ferrarius ob Herniam enterocelen morbo Iliaco laborans, medicamentis omnibus in vanum adhibitis, Ileo periit. Pellio ex secta arteria in brachio sinistro aneurismate laborans, accedente sphacelo, amputationem brachii recusans, rupto tuberculo, cum sanguis in parte demortua sisti non possit, cum sanguine animam exspiravit.

§. 15. Ad signa pestis quod attinet, ea communiter ab Autoribus dividuntur in imminencia, diagnostica & prognostica. Imminentis signa multa ab Autoribus enumerantur, quæ brevitati studens, hic saltem annotabo: - Annonæ caritas, clades hominum, muscarum, murium, & similibus abundantia, præcedentes febres petechiales, aliæque Epidemiæ, & alia. Astrologorum malas constellationes, cum fere nullum habeant fundamentum in re, & ob incertitudinem hodie à doctis parvi pendantur, nec semper illos infaustos planetarum aspectus, oppositiones, quadrata, conjunctiones, pestis secuta sit, silentio involvam, quamvis hac de re, ut solet de rebus adeo incertis, pro & contra disputari possit. Legi de iis possunt Argol. Ephem. Kircher. Scrutin. pest.



pest. Rivinus, Comes de Flisco in tract. de fato, & alii. Non opus est confugere ad venenum, aut alias occultas qualitates, cum manifestæ causæ subsunt. Repeto, quod superius jam tum innui, in peste, & in specie illa, quæ annis 1680. & seqq. Germaniam peragrata est, nullum fuisse venenum. Idem de reliquis ab Autor. sub veneni causa alias descriptis pestibus fere dixerim, cum illo tempore nondum tanta lux in Philosophia & Medicina illis affulserit. Accedit quod eadem sympt. eadem signa, eadem curatio fuerint. Signa pestis præsentis, seu diagnostica sunt dolor capitis, præcordiorum anxietas, virium dejectio, junctis pathognomicis, bubonibus & carbunculis.

§. 16. Prognostica signa naturam pestis, tanquam morbi acutissimi sequuntur, eaque sunt vel vitæ, vel mortis, apparentque citissime in corpore. Ad faciliorem autem eorundem perceptionem aphorismis quibusdam eadem includam.

1. Qui intra 24 horarum spatium nullo omnino utuntur sudorifero, ut plurimum moriuntur; magis enim magisque turbatur massa sanguinea, & in guttulas resolvitur.

2. Qui dato sudorifero satis potenti non sudant, nec repetito eodem, vel tertium exhibito, omnes moriuntur: quia sudore non subsequente massæ sanguineæ mixtura non potest restitui.

3. Qui peste correpti frigus non vitant, omnes moriuntur; illa enim pororum occlusio inhibet insensibilem transpirationem, quæ tamen in hoc morbo summe necessaria, ut multis possem exemplis illustrare, nisi res per se clara esset.

4. Quibus in regione vesicæ, vel internis corporis partibus carbunculi oriuntur, moriuntur; difficultatem enim urinæ pariunt, & interne ob impossibilem remediorum adhibitionem interimunt. Vidi in custode B. Mariæ, qui, quoad reliqua bene se habebat, sed obortis duobus carbunculis in regione vesicæ, ex hac vita migrabat.

5. Quibus Vomitus, Dysenteria, vel Diarrhœa oritur, nec sistitur medicamentis, omnes moriuntur; quia malum malo superadditur, & cuncta in pejus ruunt.

6. Gravida peste correpta, dum tempus partus instat, omnes moriuntur, quia turbata massa sanguinea spiritus suppeditare non potest, ad hos labores sufficientes.

7. Quos pestis dormiendo invadit, si intra 12 horarum spatium non evigilent, & dato sudorifero sudent, subito moriuntur.

C

8. Qui-



8. Quibus petechiæ nigra in corpore apparent, omnes moriuntur: quia totalis M. S. turbatio & humorum ætatis jam succedit. Par ratio est etiam rubrarum macularum, si in nigras degenerant, quod plerumque fit. Sine periculo non sunt, spem tamen aliquam, si dato sudorifero evanescent, præbent.

9. Quibus bubones per aliquot jam dies durarunt, & postea retrocedunt, subito moriuntur; quia dum per aliquot dies jam durarunt, materia ob obstructionem in vasis glandularum naturam acidi acquisivit; pus enim inde factum, quod rursus delatum ad M. S. eam turbat de novo, aut nondum restitutam plane dejicit, cum transeat per poros puris alius ather, quam qui est in massa sanguinis, inde hic effectus.

10. Quibus retrogredientes bubones dato sudorifero iterum aucti progrediuntur, in iis spes salutis non decollat. Patet ex superiori ratio.

11. Qui sudorifero statim post conceptum terrorem proginato bene sudant, dolore etiam capitis, anxietate præcordiorum evanescente, iis plurimum restituntur; quia massam sanguinem turbatam restitutam, globulosque bene inter se mixtos indicat.

12. Qui convulsionibus corripuntur, omnes moriuntur, cum eadem per se lethales sint.

13. Quibus post aliquos dies delirium supervenit, non sunt sine periculo.

Sufficiant hæc paucula, qui plura cupit, consulat Auctores, inpr. Barbett. tract. de peste. Certa & indubitata hæc minime possunt nominari, cum morbus sit adm. fallax, etiam tum, cum maxime blanditur, inde etiam signa alias satis bona & certa, Medicum expertissimum possunt fallere, cum minima circumstantia hic rem variare possit.

§. 17. Nunc ad symptomata, quæ in peste occurrunt, me convertam, & primo de dolore capitis, ut omnium in omni peste agam, quorum demonstratio plurimum faciet ad ostendendum, nullum in peste esse venenum, sed hæc omnia massam sanguineam turbatam, ut umbram corpus sequi. Dolor capitis est obstructio vasorum tam interiorum, quam exteriorum, orta à particulis inæqualibus, exiles vasorum meatus transgredi nescientibus, hinc distensio, & consequenter dolor ob partium vicinarum pressionem. Dolores hos capitis velle deducere à veneno, aut vaporibus ex ventriculo ad caput elevatis, nullum habet in re fundamentum. Vera causa duplex statuenda, 1. cum ob

ob malam in ventriculo ciborum solutionem crudus chylus, i. e. non satis divisus in globulos minores, vel quod æqualis sit mixtura, generatur, qui massæ sanguineæ in cordis thalamis non bene miscetur, sed una cum reliquo sanguine ad caput defertur, qui veniens ad venarum angustiores extremitates, his particulis non respondentibus meatui & poris, ibi hærent, & à subsequente arterioso sanguine vi in exiles illos meatus impelluntur, hinc obstructio, obstructionem sequitur distensio & dolor. 2. Quando massa sanguinea turbatur, i. e. ut supra monui, quando globuli non accurate amplius sunt mixti, sed conjunguntur, & ex duobus vel tribus fit unus, illi arteriolas plane ingredi nesciunt, sed pariunt obstructiones, & consequenter dolorem. Omnem autem dolorem ab obstructione & consequente partium vicinarum pressione oriri, hic demonstrare instituti ratio non permittit. *Legi possunt hac de re Cartesius & alii.*

§. 18. Virium prostratio est functionum in corpore depravatio, orta à defectu spirituum, & inde in partes influxu denegato, ob massæ sanguineæ mixturam turbatam, & animæ imperium negatum. Oritur alias virium dejectio ab impuritate massæ sanguineæ, cum ob crassitiem vel visciditatem particularum nulli spiritus per poros arteriarum in cerebro separari possunt. Hinc flaccescunt muscoli, & munia debita & solita peragere recusant.

§. 19. Vomitus cum non omnibus subjectis obveniat, causa ejus necessario in ventriculo est quærenda. Venit autem ab obstructionibus factis à materia acri intra tunicas ventriculi, quæ vellicando motum convulsivum efficit. Spiritus acidi assumpti pro ciendo sudore, symbolum suum quoque addere possunt. Nam cum omnia turbata sunt in corpore, & humores in sua circulatione impediti, hic etiam sistuntur & effectum hunc producant. Par ratio est etiam Diarrhææ. Quoniam obstructiones in glandulis intestinorum factæ, humoresque in vasa non possunt recipi, necessario ad intestinorum cavitatem amandari debent, quando jam accedit vellicatio, quæ à bile facile fieri potest, intestina eosdem humores per alvum ejicere, & ab iis se liberare coguntur. Ex dictis itaque patet hasce humorum excretionem esse sistendas, ne spiritus nimium absumentur. Dysenteria itidem oritur ab obstructione facta in arteriis, quæ ne-



cessario debent rumpi, si accedit sanguinis affluentis impetus. Acredo humorum vasa exedendo hic etiam juvat. Hæc symptomata in omnibus non observantur, sed prout humores sunt in corpore, ita etiam variant.

§. 20. Hæmorrhagia narium plurimis vulgare symptoma, tertio aut quarto die obveniens, ubi nempe obstructions in vasis capillaribus nondum penitus sublata, fit quod à tergo veniens sanguis eadem perumpat. Mensium fluxus non semper est symptomaticus, sed potest accidere, ut statò & ordinario tempore veniat, quod diligenter inquirendum à Medico, nec sistendus, nisi sit incommodicus.

§. 21. Delirium fit, cum animæ ideæ repræsentatæ non respondent poris cerebri, aut in alia vestigia incidunt, unde æger in cogitatione, dictis & factis aberrat. Notum est, necessarium esse certum & determinatum respectum ad ideas sensorii communis, item certam pororum dispositionem in cerebro, ut objecta animæ recte possint repræsentari, & illa deinde judicare & cogitata sermone efferre. Jam si ordinaria, & ut ita dicam, naturalis constitutio sensorii communis ad cerebri poros & meatus mutata est, facile potest concipi, objecta non eodem modo poris cerebri imprimi, & in glandula repræsentari, atque hinc cum menti non aliter quam turbate offeruntur, aliter etiam non potest percipere, ac judicare, hinc ratione adstantium homo delirat. Inde etiam est, quod obscæna loquantur interdum, si nempe ideæ illæ in vestigia talia, olim cerebro impressa, incidunt, ea repræsentantur denuo animæ, hæc postea eadem profert.

§. 22. Carus seu Coma somnolentum, quo cum in quibusdam pestis incipit, est cum ægri profunde dormiunt, excitati oculos aperiunt, sed profunde iterum dormiunt. A defectu spirituum Carus provenit, quia iis deficientibus fibrillæ & pori cerebri sufficienter non expanduntur, sed concidunt, inde spiritibus in nervos & membra influxus denegatur, & somnus corpus invadit. Pluribus hæc possem persequi, si instituti ratio permetteret, & alia silentium mihi non imponerent.

§. 23. Inflammatio oculorum oritur non ab effuso sanguine in partes; nam si incisionem feceris in parte inflammata, nec venas & arteriolas læseris, nullum sanguinem elicies: sed oritur.



tur à sale poros partis inflammatae ita obstruente , ut materia primi elementi liberum transitum non inveniat, inde ob velocem ejus motum partium rubedo , quam inflammationem vocamus, sequitur. Videatur de hac pluribus Alberding van de Berchzandheit / It. Overcamps Heel-konst.

§. 24. Epilepsia in omnibus non observatur, sed in iis saltem, quibus forsan in parte aliqua solida fermentum Epilepticum latens, à sudoriferorum usu expulsum est. Ad massam sanguineam cum deferitur, magna vi eam per corpus pellit, & ad cerebrum propulsum particulas justo crassiores in nervos agit, quae obstructionem ibidem efficientes spirituum progressum impediunt, unde aëri subito concidunt, & partes, quia spiritibus non satis sunt tensae, non sentiunt. Quale exemplum novi in viatoris uxore, quae mensium fluxu immodico laborabat, postea Epilepsia corripiebatur. Convulsiones à plicaturis valvularum in nervis existentium oriuntur, quae si violento modo à spiritibus rumpuntur, vel plicantur, plicas retineant, unde spiritus violenter subtilia nervorum filamenta perrumpunt, & ingentes dolores pariunt. Quia vero plicae illae nulla arte iterum explicari possunt, convulsiones omnino lethales sunt.

§. 25. Búbones sunt tumores ut plurimum in partibus glandulosis, sub axillis & inguine, ab obstructione & impedita humorum circulatione provenientes. Dum enim in corpore omnia turbantur & spiritibus orbantur, massae sanguineae globuli coeunt, ex tribus unus fit, & parvula illa vasa ingredi non possunt. Serum alias fluidum cum non sufficienter à sanguine separetur, id quod jam in ductibus exilibus glandularum est, propelli nequit, hinc stagnat, accescit. tumorem parit, in pus mutatur, tandem cutim peredit, & in ulcus terminatur. Ineptum enim est dicere, naturam, (*quam jamdudum Empedocles rejecit iniquiens; quod mortales naturam dicunt, nihil est*) ad extrema corporis expellere venenum. Opinio hæc inde videtur originem suam traxisse, quod veteres statuerint, glandulas esse emunctoria corporis, & ideo per has expelli, quae noxia sunt in corpore. Ast qui vel leviter in Oeconomia animali versatus est, facile videt, hanc sententiam esse inanem & futilem, cum tam lymphæ, quam sanguis sit summe in ea necessaria ac utilis. Legi hanc in rem merentur Malpighius & Steno accuratissimi glandularum examinatores.

§. 26. Curiosi quidam , volentes perscrutari partes constituentes veneni pestilentialis , hosce tumores , seu potius bubones manui chemicæ & igni subjecerunt , & beneficio destillationis spiritum acidum obtinuerunt , inde concluderunt veneni partes potiores consistere in acido. Sed hi commiserunt fallaciam causæ non causæ ; nam in omni ulcere , qualecunque etiam sit , est acidum , quia humores ab ambiente aëre corrumpuntur. Non igitur mirum , quod particulæ ignis acidæ junctæ acido in ulcere , s. bubone produxerint spiritum acidum. Manet ergo , bubones in corpore evenire ex impedita humorum circulatione , & eorum stagnatione. Alii bubones exsectos , & butyro frixatos canibus devorandos dederunt , quos inde dicunt mortuos. Sed , quoniam mihi tale exemplum non obtingit , certi quid dicere non possum. Forte ex alia causa canes sunt mortui , quam Autores reticuerunt , vel etiam Chirurgus quidam volens animositatem suam probare , id finxit , reticent enim illi symptomata quæ cani subvenerunt , & simpliciter eum mortuum esse dicunt. Neque indicat venenum , quod difficulter sanentur , cum alias omnia ulcera sanatu difficilia , veneno deberent turgere. Sed id dependere puto ex imperitia & mala ac negligentia Chirurgi tractatione. Id enim genus hominum hoc tempore bacchum frequenter salutat , adeoque ægros plane negligit , vel negligenter tractat. Plura de hac re essent dicenda , sed tempus & brevitatis non concedunt.

§. 27. Carbunculus seu Anthrax est ulcus cum partium proximarum inflammatione , à sanguine in vasis capillaribus in motu impedito & corrupto , ortum ducens. Res eodem modo se habet , ut in bubone ; sanguis enim nesciens ingredi tubulos exiles , qui junguntur arteriis , ut exinde venas intret , sistitur & corrumpitur. Fit autem primo pustula nigra vel fusca , brevi temporis spatio caro circumjecta inflammatur , inflammationem brevi sequitur gangræna. Petechiæ à totali sanguinis turbatione oriuntur ; Hinc poros vasorum capillarium transire nesciens sistitur & in extremitate cutis maculas exhibet initio rubras , sed brevi , nisi sanguis beneficio sudoriferi & caloris iterum per vias ordinarias ducatur , in nigras & lethales degenerant. Sitis & faucium ariditas vel ab obstructione vasorum lymphaticorum & salivarium , vel defectu lymphæ in sanguine , quando per  
insen-



insensibilem transpirationem nimium absumitur , aut per sudores , aut alio modo imminuitur. Reliqua symptomata , si adhuc quædam occurrant , brevitati studens , omisi. Poterunt autem eorum causæ , & rationes ex superioribus facile colligi.

§. 28. Hisce absolutis ad præservationem pestis me accingo. Ea est vel Animæ, vel corporis. Ante omnia autem præservatio Theologica , & animarum curatio summe necessaria , & utilis ; hac enim neglecta totus homo ob repentinam & inopinatam metuendam mortem misere periclitatur. Summum itaque Numen ardentibus invocandum precibus , ut malum , si non penitus avertere , mitiget , & hilaritatem atque animi constantiam largiri velit , qua in peste præstantius nihil. Seria hominibus agenda est pœnitentia , & vita minus consona præceptis , & voluntati divinæ corrigenda , proximus amandus , & pauperibus est benefaciendum. Hæc de præservatione Theologica. De præservatione corporis acturus . non possum ire in sententiam Autorum , omnium fœtorum amotionem præcipientium , item bestiarum , ut suum , felium , canum internecionem ; cum tamen suis pulveribus fumigantibus immisceant rasuram cornu capri , antimonium , & id genus fœtida alia. Equidem haud eo inficias , posse ab hisce terrorem concipi. Sic novi puellam , cum videret canem suum ex domo infecta egredientem , & ad se redeuntem , peste correptam & mortuam. Hunc terrorem scriptis suis impresserunt scriptores loimographi , ubi populo persuadent , ab his rebus omnibus oriri vel augeri venenum in peste , aut à bestiis deportari ex uno loco in alium. Sed falsi sunt , & , si rem æqua lance ponderassent melius sibi & populo prospexissent. Cum enim non sit contagium , neque universale , neque particulare , ut supra probatum , omnia hæc molimina sunt nullius usus , ut fumigatio in ædibus , ignes in plateis ad corrigendum aërem publicum , accensio pulveris pyrii ad corrigendum aërem in ædibus , & id genus alia. Hæc sunt externa. Quoad subjecta seu personas , iis præscribunt purgantia , sudorifera , aceta bezoardica , Elixiria præservantia , & putredinem à sanguine arcentia , diætam accuratam , vini usum , & talia plura. Sed Lector Benevole , si paululum hæc mecum perpendes , & ipsorum venenum considerabis , dices , ne nihil omnino egisse videantur , hæc præscribunt. Quid enim purgan-

tia ,

ria, cum venenum pestis massam sanguineam resolvit, proderunt, siue materia peccans è corpore sit edueta, nec ne? quid sudorifera, cum revera actu nondum adsit venenum, aut M.S. turbata? aceta-bezoardica, cum acida coagulent, & venenum pestis etiam coagulet, ut nonnullorum est sententia; tale enim additur hoc modo tali, redditur igitur magis tale. Reliqua, excepta diata, quæ optima, ut in curatione dicetur, sunt supervacanea.

§. 29. Ad veram præservationem quod attinet, in eo consistit, ut hominibus demonstretur, nullum in peste esse venenum, idque ex superioribus allatis rationibus & argumentis optime posse fieri puto. Nam quid præservatio & massæ sanguineæ curatio, nisi Medicus in eo totus sit, ut ex animis hominum præconceptæ opiniones de veneno, de putredine, amoveantur? Hanc ad rem multum conferre videtur correctio scriptorum loimicorum, ut vulgo vocantur, *die Pest ordnungen*. Nam hæc multum damni afferre mihi persuasum habeo, dum homines ea legentes, recte iudicio non utentes, pro veris & indubitatis habent, male sibi applicant, & in metum & damnum incurrunt. Nimis dura hæc esse dicta à nonnullis æstimabuntur. Ast rei veritas elucescet in eo ut supra jam adduxi, quod plebs male ratiocinetur, & pestem sibi contrahat, cum tamen ea symptomata sæpe ex alia causa proveniant. *Sic novi virginem, quæ dolore dentium & tumore gingivarum ingente laborabat, quam verula eam visitans dicebat esse bubonem, quo audito horruit, tertiaque die mortua est, & ita omnes in ea demo sine veneno infecit. Sande asseverare possum Parentem meum per totum pestis decursum nullo præservativo usum esse, nisi sponsia aceto rutaceo madefacta ad arcendum fetorem in adibus agrotantium.*

§. 30. De Amuletis, pleni sunt veterum & recentiorum libri, & indies antiquorum superstitionibus nova adduntur. Sed ingenue fateor, me non concipere, qua ratione pestem avertere possint. Si quempiam servarunt, illum fides, non virtus *Mercurii auellane inclusi, aut radicis colchici ante festum Michaëlis effossæ, aut amuletum quod bufo suspensus ad ignem, per vomitum eiecit, servavit.* Operæ pretium non est, omnia Amuletorum genera enarrare, cum ex superioribus eorum insufficientia facile possit colligi. De Amuletis plura qui cupit, adeat *Kircheri Scruti-*



*tinium pestis*, is enim multa de his compilavit & somniavit. Ineptum quoque est, quod araneas in ædibus alant, putantes eas, venenum ad se trahere. Sed tot jam experimenta in vanum facta, nullum auxilium secutum per tot jam secula. Quare miror, & satis mirari non queo, homines adeo obcecatos esse, ut ad meliora animum non advertant. Fateor Dei singularem pœnam hac in peste subesse. Homines dum Creatorem amplius non verentur, ut homo hominem timeret Deus fecit, & terrorem panicum incussit.

§. 31. Ad avertendum terrorem non juvat quotidie Baccho indulgere. Excessus multis exitio fuit. Neque veneri largius litandum, cum ea spiritus consumat, & sic corpus labefactet. Optimum est moderate vivere, & precibus indulgere. Meticulosi, ut mortem fugiant, loca externa jure petunt, sed, mox, longe, tarde, cedant, recedant, redeant. Deberem etiam nonnulla addere de ædibus pestilentialibus, earumque constitutione, ægrotantium cura, Chirurgis, & aliis tempore pestis summe necessariis; sed ne disputatio in ingentem molem excrescat, silentio hoc involvam; *potestque hanc in rem videri ordo & Methodus præservandi Civitatis Wratislaviensis, in qua omnia prolixè sunt tradita.*

§. 32. Pertinent huc etiam Fonticuli; Hos nonnulli Autorum Loimographicorum ad præservandum à peste suaserunt, putantes, quod per hos omne venenum, antequam effectum aliquem edere possit, si quod hauritur in corpore, educatur. Tormenta sunt fonticuli, & nihil utilitatis in corpore afferunt. Viderunt in ophthalmia & aliis affectibus bonum secutum quandoque effectum. Sed alia remedia idem effecerunt, quod postea fonticulis tribuerunt. Nonnulli per multos annos molestissimum & fœdissimum illud ulcus in corpore gestant, & nihil commodi inde sentiunt. Per revulsionem & attractionem agere dicunt fonticulos, & humores noxios à parte affecta hoc modo averti. Sed cum non detur attractio, & revulsio circulationi sanguinis repugnet, usus illorum plane corrui. Deinde ajunt, si pus generatur in vulnere inciso, aut per cauterium facto, hoc pus esse humorem, seu potius causam morbi in corpore. Ast si cogitent, quod hic ob incisum vulnus factæ sint obstructions in tabulis, inde humorum circulatio prohibita, & ab aëre circum

ambiente humores corrumpi, saniora consilia suis ægrotis darent, nec talibus tormentis, & molestiis afficerent. Ex dictis igitur facile liquet, fonticulorum usum quoad præservandum in peste esse nullum; nam negato veneno, eductione ejusdem non opus. Possunt fonticuli forte usum aliquem præbere, si tale vulnus incidat in vas aliquod lymphaticum; Id quod raro accidit, cum earum sub cute decursum nemo certò indagare possit.

§. 33. Referuntur huc omnia odoramenta, Balsama varia, Mōschus, Ambra, Zibethum, quæ præservandi fine in peste adhiberi solent. Sed cum eadem terrorem haud avertere possint, & plus nocuisse, quam profuisse observata sint, potius omitrenda, quam probanda sunt. Omnium optimum est vitare omnia, quæ terrori ansam præbere possunt, manere domi, orare, & cogitationes à rebus tristibus avertere.

§. 34. Absoluta præservatione ad curationem me converto. Si ea, quæ in superioribus dixi, omnibus non arrideant, spero fore, ut ea quæ de curatione scripsero haud ingrata futura sint. Statim itaque, si quis peste corripitur remedia sine mōra applicanda idonea, certi effectus, in justa dosi, & bene præparata. *Medicus autem ad ægrotum accersitus sit cordatus, & bene sibi ipsi persuadeat, venenum in peste nullum esse, adeoque non opus esse cucullatis, & quasi cataphractis Italicorum Medicorum longe simul ab ægroti lecto remanentium pestis tempore, vestimentis, solo tanquam diaboli nasuti visu agris summum terrorem incutientibus, unde morbum suum tanquam desperatissimum & contagiosissimum autumant. Potius libero præsentique animo proxime ad ægroti lectum se sistat, & cum eodem amice colloquatur, nec in tanto periculo agrum versari dicat. In eo autem sit totus, ut quantum fieri potest, ex animo agri amoveat omnem suspicionem veneni, & terroris, cum in eo dimidium cura situm sit.* Experientia docet morbo à Medico dissimulato & extenuato insigniter levatos ægros, & confidentiam in Medicum plus profuisse sæpius, quam medicamenta etiam pretiosissima. Id quod testabatur Gymnasiarchæ uxor, ejus supra mentio facta est. §. 9.

§. 35. Non possum quin paucis innuam Venæsectionem nullum hic usum asserre, cum mixturam sanguinis turbatam non possit restituere, sed eandem minuat, & spiritibus orbet. Imo sæpe



sæpe accidit, ut ægri, quibus prima vice vena secatur, in lipothymiam incidant, quæ summe in hoc morbo noxia, imo lethalis est. Par ratio est vomitoriorum & purgantium, quæ ad massam sanguineam cum transgrediantur & eandem commoveant, nullo modo adhibenda. Me non movet in hoc passu auctoritas Celeberrimorum Practicorum, forte hisce levati ægrota-  
 ntes, peste non laborarunt, & ita à purgantibus bene se habuerunt. Quid expurgent, cum non adsit venenum? Præterea universale non est in peste silere omnes morbos, ut supra jam adductum. *Centaurio Minerali Cardilucii utebatur in peste Muhlhusina Medicus quidam, horrendis & fere lethalibus vomitibus subsequen-  
 tibus cum omnium symptomatum exacerbatione, unde postm. ab eodem abstinuit.*

§. 36. Statim itaque ad sudorifera, verum & unicum hujus morbi auxilium, est confugiendum: idque pro ratione ægri, & mixturæ ipsius sanguinis, seu virium valore exhibendum est vel volatile, vel fixum, quod judicio experti Medici est commit-  
 tendum. Sed cum Medicus omnes non visitet, nec ex relatio-  
 ne sæpe statum ægri plenarie haurire possit, satius esse putem in principio exhibere pulverem ex alcalicis cum sale volat. au-  
 tum. Ne nihil omisisse videar, præcipua saltem bezoardica ad-  
 ducam, cum reliqua apud Autores satis videri possint. Inter  
 volat. sunt spirit. C. C. Tinct. Bezoard. Michaël. Wedelii, & in pri-  
 mis Parentis mei, quæ inter omnia mirandos effectus præstitit, cum  
 grati sit saporis, & sine nausea in quovis vehiculo assumi possit; præ-  
 fertim commodissime assumitur in lacte, ubi nihil omnino saporis habet,  
 nec lac coagulat. Spirit. Theriac. Camph. Spirit. Viperar. Hæc ta-  
 men per se non debent sumi, sed conjunctim cum aliis. Sal vo-  
 lat. C. C. succin. viperar. spirit. tartari non rectificat. Infusum Be-  
 zoardicum. Spiritus fuliginis, & sal volat. ejusdem (qui summo-  
 pere licet à Cardilucio deprædicetur, & à Pastore pestilentiali  
 Muhlhusano, qui eum ex Cardilucio didicerat, multis vendi-  
 tus pro secreto, tanquam præservativum certissimum, nullius  
 tamen fuit successus) liquor C. C. succinatus. Quæ omnia ob par-  
 ticulas summe volatiles, circulationem sanguinis augent, alium  
 ætherem introducunt, & ita mixturam sanguinis, obstructions  
 auferendo, restitunt. Inter fixa sunt optima Antim. diaph. Oc.  
 Cancr. pulv. bezoard. Sennert, pulv. bez. Angl. bezoard. miner. Boles

*Armena, terra sigillata. C. C.ustum C. C. Philosoph. praparat. Flor. sulph. flor. salis ammoniaci, pulv. pannon. ruber. Profunt etiam Elect. de ovo, Mihradat. Theriac. Elect. Diascord. Fracastorii. Quæ itidem agunt ob poros constantes amicum ætherem trajicientes. Ex his & supra dictis variæ possunt præscribi formulæ.*

§. 37. Primo dato sudorifero non abstinendum, sed si ægri vires sustinere possint, post quatuor aut ad summum sex horas aliud sudoriferum est propinandum in vehiculo convenienti & appropriato, ut iusculo, vel aquis destillatis sudorificis, quales sunt *Aq. flor sambuc. rosar. fumarie. Card. bened. & aliis.* Si æger par non sit ad ferendum sudorem, intra illud tempus reficiendus est vel *emulsione cordiali ex aq. destillatis, corall. alb. prapar. amygd. dulcib. oc. cancr. prapar. Antimon. diaph. &c. &*, si calor non impedit, *haustu vini. Vel aqua quadam spirituosâ cordiali & aquis destillatis inter se mixtis, vel aliis confortantibus utendum.* Deinde sudoriferum iterum propinandum est. Bene autem sciscitetur Medicus ex adstantibus, aut si ipse ægrum non visitet, ex Chirurgo pestilentiali, quamdiu, & an æger cum levamine sudaverit, an dolor capitis, anxietas præcordiorum cessarint, ut juxta eorum relationem sudoriferum vel fortius, vel mitius, vel in forma pulveris, vel mixturæ propinare possit. *Novi virginem, quæ data mixtura bezoardica nunquam sudavit, sed dato pulvere optime & cum levamine sudabat.* Si æger non sudet, lateres calefacti, aut lagenæ stannæ hunc in usum factæ, quales Batavi habent, plantis pedum admovendæ. Sudet autem duas, ad summum tres horas, si vires perferre possit.

§. 38. Mentionem hic facere debeo, quod fere fuillem oblitus lapidis Bezoardici, qui tantopere à quibusdam æstimatur, ut, nisi utatur eo Medicus in suis formulis, se morituros putent. De eo sequentia quasi in transcurso hic annotabo. *Lapis est inventus in ventriculis caprarum Indicarum, quarum magnum numerum alunt Incole Indiae tam Orientalis, quam Occidentalis, ut nobis, qui novis valde delectamur, caro satis pretio suos lapillos, quos sape per alvum, si minores sint, capræ ejiciunt, vendant. Generatur ex particulis crassis, mucilaginosiis terrestribus, accedente quiete, si nimium augetur, capræ inde agrotant, & moriuntur. Constat ex multis lamellis sibi invicem superimpositis, coloris est fusci vel mixti ex viridi & nigricante. A veteribus valdopere decantatur hic lapis in depellendo veneno per sudorem. Recentiores, cum maxima frau-*  
sub-



subsit, parum æstimant, artificialis enim naturali substituitur qui conficitur magna in copia à Judæis in Portugallia & aliis locis, cujus descriptio sumatur *ex Collegio Mat. Med. Hermannii Botanices in hac Academia Professoris, ante hac per Indiam Orientalem, nunc per totam Europam longe lateque Famigeratissimi, Præceptoris & Patroni mei ætatem Honoratissimi*. Sancte testari possum, Parentem meum ne grano quidem lapidis Bezoardici usum, cum tamen multos ægros restituerit. De ejus insufficiencia in sudore ciendo hic non agam, plura qui vult legat Autores.

§. 39. Sudore peracto æger sedulo ab ambiente aëre frigido tuendus, & in lecto hypocaustoque calidis detinendus. Necessarium non est, indusium cum novo commutare, si æger ingratum sudoris odorem perferre possit, retineatur illud, si vero non, aliud calefiat, eoque æger induatur. Per frigus, post sudorem cum levamine factum, pori corporis subito occluduntur, & transpiratio insensibilis impeditur. Præterea omnis subita mutatio in corpore pro periculosa imo lethali habetur à Practicis. Exempla talia multa possem adducere, sufficiat unicum. *Pannificis uxor, quæ jam fere restituta, cum nimium fideret sibi, viribusque suis, fenestram adit, inde lectum petens, subito moritur. Qui suaserunt indufu mutationem, fecerunt ideo, ut venenum, quod putant cum lymphâ ex corpore expulsum, & in indusio contentum à corpore amoveatur, ne iterum per poros ingrediatur. Sed oculis apertis cæci sunt, quare non etiam mutant lectum, cum in plumis & stragulis magis latere possit venenum, & corpori denuo insidias struere? Linteaminum & indusiorum mutationem noxiam & lethalem fuisse, observat Experientissimus Diemerbroek, qui de hoc videatur in tr. de peste.*

§. 40. Curationem & remediõrum præscriptionem paulo prolixius tractare debuissẽ, nisi id toties jam factum vidissẽ. Brevibus tradam symptomatum curam, cum ea, si sunt urgentia, neglecto morbo attendere debeat Medicus. Dolor capitis, si dato sudorifero non cessat; aut si redit, leniendus epithemate *ex Aq. destill. rosar. solani; verbenæ, plantaginis, nucleis Persic. sem. papav.* Vel fiat frontale in forma pulvis *ex sem. papaveris, hyosciami, addito opio Thebaico*, quod linteis duplicatis fronti applicandum. Vel instilletur vertici oleum aliquod destillatum appropriatum. Vomitus, horrendum symptoma, si materia visci-

da, aut bile tincta ejicitur, post duos vel tres vomitus, ne spiritus nimium absumat, & mixtura sanguinis perturbetur, sistatur. Hoc in casu egregia est potio ex *Elect. Diascord. Fracast. Antimon. Diaph. & pauxillo opii cum aq. destill. rosar. sambuc. &c. vel haustus vini calidi, in quo aromata cocta fuerint*. Si hæc nihil juvant, nec ventriculus assumpta retinet, haustus aquæ frigidæ juvat: Cujus exemplum vidi in Pharmacopœo pestilentiali. Ast tam æger relinquendus est, donec ventriculus cibos retineat. Eodem modo etiam Diarrhæa est tractanda, item Dysenteria, quoniam earum cura à vulgari nihil differt, prudenti Medico committenda.

41. In Hæmorrhagia narium præscribantur ea, quæ alias usitata sunt adstringentia. Sistitur optime *Aceto aquæ permixto*, & cum lintheaminibus collo applicato. Sanguini hoc modo impetus adimitur, & tanta vi in vasa capillaria non irruit, hinc hæc vasa aliqualem quietem nacta coalescunt. Delirium cum symptomata etiam sit grave, sed ut plurimum non diu duret, Medicus in hoc casu appropriata medicamenta sudoriferis admisceat. Quoad soporem statim est auxilium ferendum, & æger spiritu salis ammoniaci fortissimo ad nares applicato interne etiam ad ℥j ℥ij exhibito, expergefaciendus, vel, si hoc non succedat, videndum an medicamenta sudorifera ipsi possint propinari. Oculorum inflammatio juxta leges methodi medendi & praxeos est tractanda, ut & Epilepsia & convulsiones. Nimis excresceret dissertatio, & limites transgrederer, si omnia vellem pertractare. Adeat Præcticos, qui plura de his cupit.

§. 42. Post hæc ad bubones & carbunculos accedo, quorum curationem ex Chirurgiâ petere necessum habeo. Bubones si erumpunt, & jam majores facti, statim emollientibus emplastris vel fotibus sunt tractandi, & si per se non aperiantur, ferro sunt tangendi, si maturi, post apertionem mundificandi, & mundificati, sanandi. Ad apertionem eorundem nonnulli hic præcipiunt cauterium vel actuale, vel potentiale. Sed cum per se doleant bubones, ob humorum circulantium sufflaminationem, dolor dolori tantus non est addendus, sed ferro melius & citius aperiuntur, si maturi. Ad attractionem eorundem, vel potius veneni, ut dicunt, vesicatoriis & cucurbitulis siccis utuntur. Sed cum & hoc modo dolor augeatur, & attractio non detur, possunt opti-



timo jure omitti , & tempus suppurationis & augmenti expe-  
ctari. In principio statim fotu ex mollientibus herbis & radi-  
cibus in vino coctis eorum proventus plane potest impediri ;  
restituitur enim confestim hoc modo circulatio humorum. Idem  
etiam facit *oleum scorpionum inunctum* , simulque dolorem sistit. Si  
accedit inflammatio refrigerantia leniora adhibeantur. *Empl. dia-*  
*chyl. c. gummat. cum capis sub cineribus coctis* præstat emplastro ar-  
senicali , quod nullos fere effectus præstitit , & magis nocuit  
quam profuit.

§. 43. Carbunculi aliam tractationem postulant. Pustula sta-  
tim aperienda , materia exprimenda , & theriaca cum spiritu vi-  
ni mixta in forma unguenti imponenda. Hoc remedio sæpe pro-  
hibita est inflammatio , & consequens gangræna , vulnusque sa-  
natum est brevi. Si vero hoc non fiat , & inflammatio adsit cum  
ingenti dolore , anodyna cum medicamentis inflammationi aptis  
applicanda. Gangræna si succedat , an sapphiri , aut crysalli circa  
partem affectam circumductio , juxta Paracellsum & Helmon-  
tium eam sistat , & carnem corruptam excidere faciat , cum hac  
de re mihi certo non constet ; nec experimento confirmatum  
sciam , nihil certi affirmare ausim. Gangræna sistatur scarifica-  
tione profunda , vel si hoc nihil juverit , butyro antimonij pars  
sana tangatur , ut corrupta caro excidat : post hæc debitis me-  
dicamentis , perita Chirurghi manu tractandi , donec sanati sint.  
Uberiorem curationem qui desiderat , apud Loimographos &  
Præcticos eandem inveniet. Breviter , quantum potui omnia per-  
egi. Styli elegantiam , saltem veritatis rationem habens non ob-  
servari ; non enim oratoris , sed Medici munere functus sum.  
Si , L. B. tibi placuerint approba , sin minus , invidioso Momi  
dente rodere desiste ; si refutare Tibi animus , amice id facias ,  
non jurgiis , & calumniis , (ut nonnulli facere consueverunt) sed  
rationibus & argumentis. Meliora docentem lubens sequar , &  
si erravero , cum nihil alienum à me esse putem , in errore non  
persistam , ut veritas elucescat , & proximi emolumentum tan-  
dem inde exsurgat.

# C O R O L L A R I A.

- I. Cor non est situm in sinistra thoracis cavitate.
- II. Comedones & crinones non sunt vermes.
- III. Datur liquor, qui injectus arteriæ emulgenti per poros ac tubulos renum pergit ad ureteres, ad vesicam, & per penem potest exprimi.
- IV. Spiritus salis ammoniaci cum calce viva factus non inducit phthisin.
- V. Morborum causas posse indagare, non facit Medicum, sed remediorum justa applicatio.
- VI. Si datur Alcahest, datur ex Mercurio.
- VII. Medicamenta sarcotica, & Epulotica nulla dantur.
- VIII. Plurimi morbi imaginatione augentur, non vi causa morbigica.
- IX. Veronica minus commode Herba Thee substituitur.
- X. Canis Vagine uteri procidentiam passa, coit, & concipit.
- XI. Clavi & verruccæ pedum non ab humoribus pravis, aut à bile oriuntur, sed sunt filamentorum cutis prolongationes.
- XII. Sarcocèle ex sanguine impuro ad testiculos aut scrotum affluxo, & in carnem degenerante, originem non habet.
- XIII. Catarrhus non à capite, sed à proximis arteriis & vasis lymphaticis originem sumit.
- XIV. Gustus & odoratus optimi, & certissimi virtutum plantarum indagatores.

F I N I S.